

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE
Broj: 01 0 K 010978 17 Kž
Sarajevo, 15.11.2017. godine

U IME FEDERACIJE BOSNE I HERCEGOVINE!

Vrhovni sud Federacije Bosne i Hercegovine u Sarajevu, u vijeću sastavljenom od sudija Mujanović Ismete kao predsjednice vijeća, Filipović dr Ljiljane i Radošević Sonje kao članova vijeća, uz sudjelovanje Šeta Mevlide kao zapisničara, u krivičnom predmetu osuđenog O. M., zbog krivičnih djela Ratni zločin protiv ratnih zarobljenika iz člana 144. preuzetog Krivičnog zakona SFRJ i Teški slučajevi razbojničke krađe i razbojništva iz člana 151. stav 2. u vezi sa članom 150. Krivičnog zakona Republike Bosne i Hercegovine, odlučujući o žalbi osuđenog O. M., izjavljenoj protiv presude Kantonalnog suda u Bihaću broj 01 0 K 010978 17 Kv od 25.09.2017. godine, u sjednici vijeća održanoj dana 15.11.2017. godine, donio je

P R E S U D U

Žalba osuđenog O. M. se odbija kao neosnovana i presuda Kantonalnog suda u Bihaću broj 01 0 K 010978 17 Kv od 25.09.2017. godine potvrđuje.

O B R A Z L O Ž E N J E

Presudom Kantonalnog suda u Bihaću broj 01 0 K 010978 17 Kv od 25.09.2017. godine preinačene su u pogledu odluke o kazni pravomoćna presuda Kantonalnog suda u Bihaću broj 01 0 K 010978 16 K od 28.09.2016. godine, kojom je optuženi O. M. osuđen na kaznu zatvora u trajanju od 2 (dvije) godine i pravomoćna presuda Višeg suda u Bihaću broj K 22/96 od 11.11.1996. godine, kojom je optuženi O. M. osuđen na kaznu zatvora u trajanju od 9 (devet) godina tako što su ranije izrečene kazne zatvora uzete kao utvrđene pa je osuđeni O. M., primjenom člana 54. Krivičnog zakona Federacije Bosne i Hercegovine (KZ FBiH) i člana 340a. Zakona o krivičnom postupku Federacije Bosne i Hercegovine (ZKP FBiH), osuđen na jedinstvenu kaznu zatvora u trajanju od 10 (deset) godina i 11 (jedanaest) mjeseci, u koju mu se ima uračunati vrijeme provedeno u pritvoru i na izdržavanju kazne zatvora po tim osudama.

Protiv ove presude žalbu je izjavio osuđeni O. M. U žalbi nisu izričito navedeni žalbeni osnovi, a iz sadržine žalbe proizilazi da se prvostepena presuda pobija zbog odluke o kazni, s prijedlogom da se ona preinači tako što će se osuđenom izreći jedinstvena kazna zatvora u kraćem trajanju.

Osuđeni u žalbi nije tražio da bude obaviješten o sjednici vijeća ovog suda.

Federalni tužitelj podneskom broj T01 0 KTRZZ 00024565 17 od 09.11.2017. godine predložio je da se žalba osuđenog O. M. odbije kao neosnovana.

Ovaj sud je ispitao pobijanu presudu u granicama žalbenih navoda i po službenoj dužnosti u smislu člana 321. ZKP FBiH tj. da li je na štetu osuđenog povrijeđen krivični zakon, pa je odlučio kao u izreci iz sljedećih razloga:

Pobijajući prvostepenu presudu, osuđeni O. M. u žalbi ističe da smatra da mu je prvostepeni sud pri izricanju jedinstvene presude „malo skinuo na spajanju dvije kazne“. Osuđeni, potom, navodi presude koje su preinačene u odluci o kazni pobijanom presudom i trajanje kazni zatvora izrečenih tim presudama te ovaj sud moli da uzme u obzir da je kaznu koja mu je izrečena presudom iz godine u trajanju od 9 (devet) godina izdržao u ukupnom trajanju.

Žalba osuđenog O. M. je neosnovana. Naime, žalbom se prvostepena presuda pobija zbog odluke o kazni i predlaže da se osuđenom izrekne jedinstvena kazna zatvora u kraćem trajanju. Međutim, u žalbi se taj prijedlog potkrepljuje samo činjenicom da je osuđeni kaznu zatvora u trajanju od devet godina, koja mu je izrečena presudom iz ... godine, izdržao u ukupnom trajanju. Ovaj sud nalazi da ta okolnost, sama po sebi, ne ukazuje da prvostepenom presudom osuđenom O. M. nije pravilno odmjerena jedinstvena kazna. Osim toga, pobijanom presudom je određeno da se osuđenom u izrečenu jedinstvenu kaznu zatvora u trajanju od 10 (deset) godina i 11 (jedanaest) mjeseci ima uračunati vrijeme provedeno u pritvoru i na izdržavanju kazne zatvora po presudama koje su preinačene u pogledu odluke o kazni tom presudom. Prema tome, osuđenom O. M. u izrečenu jedinstvenu kaznu uračunaće se ukupno vrijeme provedeno na izdržavanju kazne zatvora i po presudi iz ... godine.

Pošto ne postoje razlozi zbog kojih se presuda pobija žalbom, ovaj sud je, na osnovu člana 328. ZKP FBiH, donio presudu kojom je žalbu osuđenog O. M. odbio kao neosnovanu i prvostepenu presudu potvrdio.

Zapisničar
Šeta Mevlida,s.r.

Predsjednica vijeća
Mujanović Ismeta,s.r.